

Poštovani,

shvatajući važnost i neizbježnost ideje i prakse “permanentnog obrazovanja” u svijetu moderne proizvodnje i tehnologije, Vanjskotrgovinska komora Bosne i Hercegovine već više od 18 godina djeluje i radi na području profesionalnog osposobljavanja i obrazovanja kadrova svojih članica.

Vođeni zadacima i edukativnim programskim ciljevima Vanjskotrgovinske komore Bosne i Hercegovine, cilj nam je upoznati svoje članice, privredne subjekte, sa novim idejama, znanjima i vještinama. To činimo kroz savremene, aktuelne programe obrazovanja, usavršavanja i profesionalnog osposobljavanja, a shodno životnim potrebama i kontekstu vremena u kome živimo. Poseban naglasak stavljamo na poduzetništvo i menadžment, sa praktičnim ciljem: povećati proizvodnu efikasnost i tržišnu konkurentnost svojih članica na domaćem i inostranom tržištu.

Ovogodišnje aktivnosti Sektora za edukaciju VTKBiH će biti fokusirane na spoj teorije i prakse, razmjenu pozitivnih iskustava sa vodećim predstavnicima industrijskih grana te inovacija na tragu održivog razvoja i neizbježnog brendiranja proizvoda/usluga. U tom kontekstu, organizirat ćemo seminare, škole i radionice u skladu sa izraženim zahtjevima naših članica i partnera.

Shodno tome, svake godine osmišljavamo i kreiramo aktuelne edukativne aktivnosti. Pored već postojećih, navest ćemo samo neke od njih: Škola vanjskotrgovinskog poslovanja, Škola ekonomske diplomatije, FIATA škola špedicije, Upravljanje lancima nabavke, Biznis škola za menadžere i dr.

Naši predavači su kompetentni eksperti iz predmetnih oblasti, a dolaze iz nadležnih ministarstava, fakulteta, privatnih kompanija i konsultantskih kuća.

Dinamički gledano, kroz Sektor za edukaciju tokom poslovne godine prođe i do 1.500 privrednika. Upravo zato, aktivnosti Sektora finansijski podržavaju i strane organizacije koje djeluju u BiH.

VTK BiH će i 2019. godine imati posebno aktivnu ulogu u pripremi privrede za članstvo u EU odnosno, što efikasnije uključivanje privrednih subjekata za prijavljivanje i učešće u projektima i fondovima EU kroz zajedničko djelovanje na privlačenju investicija, povećanju izvoznih mogućnosti te zajednički nastup na trećim tržištima, prijenos znanja i kapaciteta u vezi sa profesionalnim i stručnim obrazovanjem.

Ukratko, VTK BiH će samostalno i u partnerstvu sa vladinim i nevladinim organizacijama iz BiH te predstavnicima poslovne zajednice, nastaviti sa edukacijom bh. preduzeća. Cilj ovih edukacija je povećanje kompetencija naših preduzeća za rad na domaćem i stranom tržištu te unapređenje izvoznih mogućnosti i podizanje njihove tržišno-konkurentne sposobnosti.

Realizacija planiranih škola (seminara, radionica) ovisit će, prije svega, od interesa članica. Naravno, VTKBiH će, na tragu vlastite vizije i misije, i naredne godine biti i ostati lider u pružanju stručno-edukativnih usluga u BiH.

Dr.sci. Elma Kovacevic-Bajtal, direktor

Dobro došli!!!